

Comedia Musical "Mago di Oz" clapa presenta Diamars awor

E obra ta hopi bunita y fascinante



ORANJESTAD (AAN): Diahuebs tabata tin e ensayo general di e Comedia musical "The Wizard of Oz", cual obra ta priminti di lo ta un beyeza y cu sigur lo capta atencion completo di e audiencia for di cuminsamento te final.

E obra aki presenta pa Anali Cabrera Cancer Foundation (ACF) ta bao auspicio di UNOCA, Cede Aruba, Prins Bernhard CultuurFonds, VNO y DCA.

E obra a bini for di un buki clasico di literatura pa mucha, skirbi pa Lyman Frank Baum na 1900 y ta un di e historianan mas conoci di cultura di Merca y a wordo traduci den hopi idioma.

Wizard of Oz tabata e prome buki pa mucha cu personan ahenan y lugarnan tipico di Merca. Den e epoca ey tur buki pa mucha tabata papia solamente tocante historia,

personahe y lugarnan na Europa.


AFC a haci un adaptacion na papiamento di e historia famoso aki, "E mago di OZ" y tin un elenco di artistanan renombra di nos isla cu ta hunga e diferente rolnan.

E historia ta conta di e mucha muher Dorothy cu ta yega na e mundo di Oz. Lo mira e experticio di actuacion di e autor y director di e obra Patty Tjon Cabrera, den papel di Dorothy.

Den e storia nos muchanan ta siña diferencia entre bon y malo y consecuencia cu esaki tin pa nan. E lugarnan cu ta bin dilanti den e obra ta lugarnan di Aruba y e musica ta nos propio musica. Pero pa muestra e faceta multicultural na Aruba tin cancionnan tambe na diferente idioma..

Otro personahe y esaki sigur lo bira e personahe menos gusta den e obra, ta e bruha.

Pero e publico lo goza e actuacion mahistral di e actriz popular Faritah Luidens den e papel aki. E bruha ta wordo enfrenta pa e conocida cantante y popular ademas, Angela Croes y e sostennan den e obra ta bini di Ferdinand Franca cu ta e Wantomba y Fernando Luidens cu ta hunga papel di Shon Bleki. E dosnan aki sigur ta duna realce den e actuacionnan y no por keda sin menciona e actriz cu tambe ta popular como actriz, Marjory Vermeer-Luidens cu lo demostra su nivel halto como actriz un biaha mas. E ta e Tia Emma, mientras e animalnan cu lo mira ta e cacho y leon y hunto cu nan e bon hada, e "fairy" cu ta wordo interpreta pa Lukee Croes. Nos ta haya Rachel Albergia como e cacho Toto y Leitja Osorio como e Leon cobarde. Mirto Tromp ta interpreta e



papel di e Mago di Oz. E otro interpretenan cu lo mira riba escenario lo ta e cursistanan di e tayer "Crea y Siña" y nan lo hunga rol di e pueblo di Oz, y di e macaco bula-dornan. Tur ta canta y balia durante e obra cu ta cuminsa exactamente 7 or anochi na Cas di Cultura diamars awor. E fotonan ta di ensayonan di e obra.

